



大明太祖高皇帝御製般若心經序

二儀久判萬物備周子民者君君育民者法其法也三綱五常以示天下亦以五刑輔弼之有等凶頑不循教者往往有趨火赴淵之為終不自省是凶頑者非特中國有之盡天下莫不亦然俄西域生佛號曰釋迦其為佛也行深願重始終不二於是出世間脫苦趣為其效也仁慈忍辱務明心以立命執此道而為之意在人皆在此利濟群生今時之人罔知佛之所以每云法空虛而不實何以導君子訓小人以朕言之則不然佛之教實而不虛正欲去愚迷之虛立本性之實特挺身苦行外其教而異其名脫苦有情昔佛在時侍從聽從者皆聰明之士演說者乃三綱五常之性理也既聞之後人各獲福自佛入滅之後其法流入中國間有聰明者動演人天小果猶能化凶頑為善何況聰明者知大乘而識宗旨者乎如心經每言空不言實所

言之空乃相空耳除空之外所存者本性也所以相空有六謂口空說相眼空色相耳空聽相鼻空嗅相舌空味相身空樂相其六空之相又非真相之空乃妄想之相為之空相是空相愚及世人禍及今古往往愈墮彌深不知其幾斯空相前代帝王被所惑而幾喪天下者周之穆王漢之武帝唐之玄宗蕭梁武帝元魏主焘李後主宋徽宗此數帝廢國息政惟蕭梁武帝宋之徽宗以及殺身皆由妄想飛升及入佛天之地其佛天之地未嘗渺茫此等快樂世嘗有之為人性命而不覺而又取其樂人世有之者何且佛天之地如為國君及王侯者若不作非為善能保守此境非佛天者何如不能保守而偽為用妄想之心即入空虛之境故有如是斯空相富者被纏則姪欲並生喪富矣貧者被纏則諸詐並作殞身矣其將賢未賢之人被纏則非仁人君子也其僧道被纏則不能立本性而見宗旨者也所以本經題云心經者正

欲去心之邪念以歸正道豈佛教之妄耶
朕特述此仗聰明者觀二儀之覆載日月
之循環虛實之孰取保命者何如若取有
道保有方豈不佛法之良哉色空之妙乎

般若波羅蜜多心經序

唐釋慧忠撰

夫法性無邊豈藉心之所度真如非相詎
假言之所詮是故眾生浩浩無窮法海茫
茫何極若也廣尋文義猶如鏡裏求形更
乃息念觀空又似日中逃影茲經喻如大
地何物不從地之所生諸佛唯指一心何
法不因心之所立但了心地故號總持悟
法無生名為妙覺一念超越豈在繁論者
爾

般若波羅蜜多心經

唐三藏法師玄奘譯

觀自在菩薩行深般若波羅蜜多時
照見五蘊皆空度一切苦厄舍利子
色不異空空不異色色即是空空即
是色受想行識亦復如是舍利子是
諸法空相不生不滅不垢不淨不增
不減是故空中無色无受想行識無
眼耳鼻舌身意无色聲香味觸法无
眼界乃至無意識界无無明亦无無
明盡乃至无老死亦無老死盡無苦
集滅道無智亦无得以無所得故菩
提薩埵依般若波羅蜜多故心無罣
罣无罣罣故無有恐怖遠離顛倒夢
想究竟涅槃三世諸佛依般若波羅
蜜多故得阿耨多羅三藐三菩提故
知般若波羅蜜多是大神呪是大明
呪是無上呪是无等等呪能除一切
苦真實不虛故說般若波羅蜜多呪
即說呪曰

揭帝揭帝 般羅揭帝 般羅僧揭
帝 菩提僧莎訶

般若波羅蜜多心經

般若心經 第三張

此經之由來
聖朝之於佛法
如來之出世
般若波羅蜜多心經
此經之由來
聖朝之於佛法
如來之出世
般若波羅蜜多心經

般若波羅蜜多心經

校勘記

- 一 底本，金藏大寶集寺本。
- 一 卷首二序爲明徑山藏所獨有，茲補入。
- 一 三八五頁中二行首字「唐」，**石**、**資**、**磧**無。末字「譯」，**石**、**資**、**磧**、**普**、**南**、**徑**、**清**作「奉詔譯」。
- 一 三八五頁中二行第二字「帝」，**資**、**磧**、**普**、**南**、**徑**、**清**作「諦」，下同。
- 一 三八五頁中二行第五字「般」，**資**、**磧**、**普**、**南**、**徑**、**清**作「波」，下同。
- 一 三八五頁中末行「僧莎」，**石**作「莎婆」；**資**、**磧**、**普**、**南**、**徑**、**清**作「薩婆」。